

**Bank Negara Perkenalkan Laman Sesawang Pendidikan Kewangan Baharu  
Bernama  
12 Oktober , 2011**

KUALA LUMPUR, 12 Okt (Bernama) -- Bank Negara Malaysia hari ini memperkenalkan laman sesawang pendidikan kewangan yang baharu dibangunkan, dikenali sebagai "Islamicfinanceinfo" yang akan melengkapkan laman sesawang "Bankinginfo" dan "Insuranceinfo" yang sedia ada pada masa ini.

Laman sesawang "Islamicfinanceinfo" itu mengetengahkan maklumat tersendiri mengenai kewangan Islam seperti konsep dan produk syariah yang boleh diperolehi di pasaran runcit bagi memudahkan pemahaman pengguna mengenai kewangan Islam, katanya dalam satu kenyataan.

Laman sesawang itu yang boleh diakses di [www.islamicfinanceinfo.com.my](http://www.islamicfinanceinfo.com.my), dibangunkan bersempena dengan "Minggu Kesedaran Kewangan 2011" yang bermula di The Village Mall, Sungai Petani hari ini.

Acara yang berlangsung selama seminggu ini dan akan berakhir pada 18 Okt, adalah inisiatif bersama bank pusat, Suruhanjaya Sekuriti, Biro Mediasi Kewangan, Agensi Kaunseling dan Pengurusan Kredit dan Malaysia Deposit Insurance Corporation.

Persatuan Bank-bank Malaysia akan turut menyertai dalam acara tahun ini bersama-sama dengan Persatuan Insurans Am Malaysia dan Persatuan Insurans Hayat Malaysia.

Bertemakan "Financial Literacy, Happy Life", acara itu diadakan di Johor Baharu tiga tahun lepas, Kuala Terengganu pada 2009 dan Kota Kinabalu tahun lepas.

Maklumat mengenai acara itu boleh diperolehi di [www.m2k.com.my](http://www.m2k.com.my) atau menghubungi BNMTELELINK di 1-300-88-5465.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=619394>